

張千里醫案精華

上海秦伯未編纂

中風

向多痰火。氣逆易咳。晨圍痔必翻。非揉擗不能收。甚或痔血大來。此足見肺胃大腸氣血虛久矣。今卒然神思昏亂。並無暈仆。而右肢遽不能用。舌蹇語澀。便間旬日纔行。乾少溇多。洩頻數而澇少。且赤。嗽痰頗濃。息有音。少寐易煩。不昏瞽而間有錯語。此屬老年氣血兩虛。春夏之交。不耐火氣升洩。虛陽化風。挾痰火勃動於中。而外阻其絡脈。內擾其神志也。據現證是中絡兼腑。初時右肢不用。今漸能運動。而肌膚痛癢無關。是不仁也。不仁爲血虛。偏右則氣亦虛矣。但舌苔白滿而厚。是氣燥津虛。脈虛而弦。兩寸較大。是心肺兩虛。而又有痰心主血。肺主氣。虛則火易上升。而氣易下滯。所以有數圍易怒多煩少寐等弊矣。此時欲益氣而不滯痰。養氣而不膩膈。庶乎虛實兼到。據述愚見。宗古人痰

火內中者。先治其內。務使神明不爲痰火所擾。心君泰然。則百體從令矣。卽或肢體不仁。未能遽復。不妨緩緩圖治。况心主血脈。心旣清則血脈之流行自易。

西洋參 茯苓 蜜炙甘草 川貝母去心 桑葉 炒山楂 法半夏 驢皮膠 竹葉

枳實 橘皮 棗仁 蓮肉去心

又 舌胎已退而舌質胖。痰來輕薄。氣息舒得大便暢行。溏而老黃者數次。今又七日不更衣。洩漸利而色來清。胃納稍和。夜未酣睡。痔外翻而腐。續下痰物。或中有痔膿夾雜。亦未辨別。統觀諸症。大都痰漸化而火未熄。陽明胃腸津液虛耗。遽難充和。所以寐少而復便閉。不獨痔翻。尤昭著也。陽明外主肌肉。內主津液。津液虛則無以灌輸肌肉。而束筋骨利機關之權。亦弛而不張。右肢之不仁。蓋由於此。不仁則不能用矣。今欲求其不致成廢。當先養陽明以存其津液。胃和則寐安。陽通則便調而痔收。治內正所以治外也。脈仍虛。兩寸獨大。大非心肺之有餘。乃虛陽之上僭耳。故耳鳴舌胖。心煩易怒。畢露其機。此時當大氣

升洩宜柔靜通養爲主。久之若得步履稍可。躡曳便能扶杖逍遙矣。

西洋參 麥門冬 炒棗仁研 大生地 蜜炙大有芪 酒炒白芍 陳皮 驢皮膠

金石斛 甘草 煨柿餅

又不仁爲氣血不通。先宜通養陽明。前案論之詳矣。今右肢漸知痛癢。足見脈絡漸有流通之意。但大便艱澀。脈象沈滯。耳鳴舌蹇。神氣不振。欲望陽明腸胃之充和。以期氣通血潤尙遠。然此症首重腸胃。必須窮究其所以難通之故。老年風閉。前賢多責諸血液之虛。想近年來痔血之去。亦復不少。血虛則風動。欲腸胃之潤。則養血正不可少。今胃氣稍醒。似可參入濡潤養血之品矣。

潞黨參 麥門冬 杏仁 柏子仁 蘇子炒研 大生地 驢皮膠 川貝母 酒炒歸身

大麻仁

又肢體熱癢而疼。是血虛風燥所致。絡脈如此。腸胃益可知矣。所以難必越數日也。高年中風。大都爲血液不充。內風旋擾之故。前賢有侯氏黑散。以內

填空竅。以防風之復襲。有地黃飲子。以內養血液。以杜風之內生。皆篤論也。而便難一症。尤爲血虛的證。所有風秘治法亦不一。然又須因時制宜。今未入秋。而先形內燥。將來何以禦秋燥正令。計從先爲之圖。用清燥救肺方。綢繆未雨。稍參和絡養胃法。冀其府通。然後絡和。

西洋參 麥冬 火麻仁 大生地 蜜炙石膏 杏仁 炙草 桑葉 驢皮膠 陳皮
米仁 枇杷葉

向有偏頭風。痛甚則或有眩嘔。今煩勞傷陽。陽虛風動。旋擾清空。絡脉弛懈。陡覺右肢痛而左肢不用。是風中在左也。迄今五日。嘔吐痰飲已止。右額微腫而痛。食少便結。脈虛濇。此腑絡兼中之症。痰爲虛痰。風爲內風。宜清養陽明。柔息厥陰。冀其漸愈。曾有便血。當此燥令。尤須遠剛用柔。

西洋參 陳皮 胡麻仁 鉤藤鉤 羚羊角 茯苓 杭茶菊 霜桑葉 驢皮膠 丹皮
稽豆衣 絲瓜絡

七月下旬。間瘧四作。繼以泄痢。此伏氣晚發。未必清澈。遽因孫受病。殤勞憂悲傷動於中。風寒迫於外。逐感風燥作咳。凡憂悲傷肺。風燥亦傷肺。以致痰雖出而風燥之火迄未化。鬱極而升。陡然舌蹇涎流。官骸俱不能自主。然現症多在半身以上。而足仍能行。知非風中腎厥。是痰火內擾之類中矣。况痰中亦有淺深內外虛實之別。此痰火乃外感風燥之火之痰。故舌蹇等症能暫退。亦能復盛。蓋痰出即火熄。痰不出即火復熾。所以越五六日而諸症復作也。今身熱有汗。面紅齒燥。舌蹇涎流。右手指微強。自言口燥之極。脈得滑而右寸關尤甚。顯屬肺感風燥未清。痰火上擾。脈絡之類中也。宜滋肺氣。存胃津。以化痰爲主。痰出則火風自熄。邪去則類中亦平。

西洋參 蜜炙石膏 橘紅 天竺黃 驢皮膠 杏仁 丹皮 霜桑葉 川貝母 羚羊角

甘草 枇杷葉

暑 溫

煩勞傷陽。肺衛疎豁。冬溫風燥之邪。實於肺衛。初起卽見微寒而盛熱。咳嗽錯語。迄今旬日。燥熱氣急。呼吸有音。痰濃而少。嗽甚不爽。頭痛雖罷。耳鳴顫紅。脣燥舌乾。苔白有裂。欬引胸脇隱痛。脈寸關俱滑數而促。此冬溫客肺之重症也。八旬高年。素有腸痔。津液久虛。今肺痹喘欬。邪無出路。最易劫津涸液。痰膠氣喘益甚。頭汗。最防驟脫。慎勿因小有鬱怒滯氣。拋荒主病。蓋雖小有食滯。今已大便一次。腹右有塊。不過腸滯未盡。肺與大腸表裏也。潤肺卽可通腸。故此時以滋氣化痰。急救肺以存津液爲要着。

西洋參 橘紅 鮮生地 川貝母 米仁 杏仁 地骨皮 桑白皮 冬瓜子 炙草

茅草根 枇杷葉

投清營宣氣。存津透邪方藥。脈象僅得濡緩弦虛。不致模糊。難以尋按。濡緩爲風爲胃。神虛則陽氣濕遏。弦爲濕釀痰濁。凡春夏之交感症。風爲春之餘氣。濕爲夏之王氣。故現症每每如此。其昏昏如醉。蒸熱舌黃而灰。溺赤便閉。癱

疹隱隱。現於肌腠。欲達不達。都屬濕溫。二氣薰蒸鬱遏。似煙似霧。清明之氣。皆爲蒙蔽。所謂肺氣窒痺。不能宣化。則周身之氣皆痺。而化解不易耳。今雖未有大效。所幸安靜。不致躁擾。舌邊齒板。稍有潤澤之意。若得一味拯治。七八日工夫。或有挽回之望。

犀角 鮮生地 蓮喬 小川連 天竺黃 石菖蒲 炒山梔 丹皮 陳胆星 橘紅

蘆根 竹葉 至寶丹 燈心湯 鎔化下先服

暑濕阻氣。鬱而爲熱。汗出不解。邪迫心包。目赤耳聾。神昏譫語。幸得欬嗽。疹出。諸症漸退。迄今兩月。稍得安寐。納穀。惟氣火蒸騰。乾咳未罷。目眇赤。脈象濡滯。是暑退而熱未化。宜甘平淡滲。以清氣化濕。若小心調養。不致食復勞復。則愈期亦不至遷延也。

西洋參 川貝母 鮮石斛 飛滑石 杏仁 天竺黃 米仁 竹葉 橘紅 炒山梔

通草 蘆根

痰瘧三年。近漸作止不常。大抵過勞輒發。已是勞瘧景象。瘧時溺數不禁。是陰不內守。煩渴引飲。是津不上騰。况兼痔漏復潰。膿水淋漓。氣液之消亡甚矣。比復當春夏陽氣升洩之時。陡然凝寒而熱。渴嘔痞。攻脇痛。神煩。此屬濕溫之氣。乘虛襲入。兼鬱於肺胃。少陽氣絡阻痺。游行三焦也。今熱退食進。脈象弦數已平。惟見虛弱濡滯。病勢似將退舍。然口乾舌碎。苔白神衰。氣奪汗多。食少寐不能安。虛體感邪。邪既未化。而正已告疲。深慮汗液過多。津氣內奪。虛脫驟見。幸勿以小愈而忽之。

西洋參 甜杏仁 茯苓 蔗皮 黃芪皮 麥冬 川貝母 炙草 金石斛 豬苓

炒穀芽 竹茹

前投清肺化邪。清心安神方。諸恙漸退。胃納亦增。復因勞煩傷陽。風溫乘隙而入。微寒而熱。欬嗽又甚。痰多黃色。中夾粉紅。氣急頭汗。溺黃舌白。脈濡數弦。明屬復感。所以諸恙皆來。急宜清熱化邪。毋使喘汗復盛。

西洋參 杏仁 牛蒡子 羚羊角 川貝母 丹皮 桑白皮 枇杷葉 天竹黃 茅根
地骨皮

又腸腑已通。所下宿矢頗多。腸通則胃和而肺亦降。今寢食俱安。熱退痰少。耳聰目明。舌邊紅苔薄白。脈虛小和緩。症情已臻安善矣。而感症之後。食復勞復。最宜謹慎。治法不宜驟補。清養肺胃大腸。以通爲補。俾寢食漸復其常。卽是不補之補。

西洋參 陳皮 鮮生地 米仁 金石斛 茯苓 丹皮 炙草 川貝母 枇杷葉

□ 濕 症

腸風下血經年。至今冬纔止。陽明腑絡皆虛矣。初夏寒熱發斑。亦是風濕爲病。癍後風濕之邪。似未清解。風動厥陰。則右側腰胯痛。少腹攻脹。濕阻少陰。則右腿痺痛。不能屈伸轉側。風濕相合。鬱蒸爲熱。則身熱惡寒汗多。溺黃便反結閉。舌白不渴。胃鈍食少矣。近復痰涎上壅。咳嗽不爽。亦是濕濁所化。脈虛而

弦。總之皆外邪風濕未清之故。然風輕濕重。尤宜通陽化濕爲主。必先退其鬱蒸之熱。務使汗斂便調。庶無虛脫之慮。至於痺痛。不妨緩圖。

生冬朮 枳殼 橘皮 絲瓜絡 滑石 米仁 石膏 蘆根 杏仁 防己 茯苓

又 蒸熱漸止。熱時仍有汗泄。稍寐便亦稍潤。右胯疝阻。與右髀痺痛相連。以致轉側屈伸。不能皆適。舌白口膩。胃鈍溺少而黃。脉又弦遲。總之濕蒸熱鬱。腑絡皆痺。其痺之所以難通者。中有疝氣橫膈。升降之氣。皆爲所阻。而厥陰既不調暢。陽明益加壅塞矣。疏厥陰以平疝氣。通陽明以和腑絡。幸冀緩緩向安。

洋參 橘皮 米仁 煨石膏 豨薟草 麥冬 茯苓 防己 忍冬藤 絲瓜絡

威靈仙 川棟子 酒青皮 川牛膝

陽虛濕勝之體。兼之起居飲食。不能慎攝。或胸悶。或便溏。或夢洩。面黃形瘦。舌白脈滯。反覆不常。何以調理。計惟常服丸劑。緩以圖之。若能謹慎自愛。庶有康復之期。

寶生丸 鮮藿香葉煎湯下

長夏右顛發瘍。原屬陽明濕火上蒸。不與降而與升。則非但陽明腑氣不降。而厥陰之濕火。亦因之上升。以致右足大趾痛。氣逆由足及腹。上至脘脇臌脹。皮膚間蠱蟲如蟲行。減食消渴口苦。舌黃脉弦而數。顯屬胃不降而肝反升。宜通宜降。勿因高年。遽投膩補。究宜憑脈症以去病。去病卽所以顧正也。病屬易治。雖糾纏已久。勿憂之。

鮮生地 雲苓 川棟子 大腹皮 白蒺藜 小川連 米仁 絲瓜絡 丹皮 青皮

澤瀉 佛手柑

又 肝陽挾濕。循絡上行。由足大指循腿入腹。犯胃過鬲抵咽。甚或頭面肩背都爲氣燄所及。肝經之循腹。本有兩路。一由中抵鬲。一循陰器毛際。旁連少腹兩胯也。汗多少寐。煩躁臌脹。舌黃口渴足冷。皆由肝氣挾濕。未能清化。以致易升而難降也。今脈之弦象。稍有和緩之意。數象已退。大便漸有溏意。而尙欠通

暢。此時總宜調肝化濕。主通主降。慎勿因寢食未和。體氣倦怠。遽投填補。經月工夫。當必漸臻安吉。

歸鬚 川棟子 澤瀉 雲茯苓 米仁 小茴香 白蒺藜 絲瓜絡 川連 青皮 橘核

又 疊投辛溫苦滲以通腑化滯。非但諸症不退。而大便反加燥結者。良由時際秋深。當王之燥氣。必勝於長夏濕熱之餘氣。以致肺胃大腸之結澀者。益形虛燥。燥則津氣皆澁而不行。凡肺胃大腸之主乎通降者。既不循職。肝脾之主乎升者。益升矣。今脈得滑大弦搏。舌邊黃燥而中心光。口燥胃鈍。脇腹脹痛。宜滋養肺胃之津氣。以通潤大腸為主。腸通則胃和。胃和則痰濕駁雜之氣。皆可順流而降也。

西洋參 杏仁 丹皮 火麻仁 旋覆花 炙蘇子 米仁 柏子仁 鮮石斛 白蒺藜

蛤殼

寒熱參差。原屬秋深晚發。迄今月餘。餘熱蒸蒸汗多。便溏溺黃。脈小弦數。

胸腹白疹續發未已。此濕熱餘邪。尙未盡化。阻痺蒸鬱。腑腸既未通降。則宿痞自然升逆。疏腑通陽。濕熱漸化。則痞自漸和矣。

西洋參 杏仁 稽豆衣 澤瀉 廣陳皮 炒穀芽 丹皮 桑葉 雲茯苓 白蒺藜

左牡蠣 蘆根

平居嗜酒。濕凝陽鬱爲病。去秋四肢疼痺。兩足及左臂爲甚。乃是濕蒸氣滯。足太陰陽明脈絡不宣也。繼則鼻衄。難經所謂陽絡傷則血外溢。陰絡傷則血內溢。熱泄氣通。自然絡痺較衰矣。今春左乳結核。時欬痰稠。體疲脈濡。舌黃目昏耳鈍。亦濕邪上蒙耳。然絡病宜清。腑病宜通。時值夏令。收效難速。擬用和陽化濕。清氣宣絡緩圖之。

潞黨參 法半夏 木防己 赤豆衣 竹茹 新會皮 生冬朮 川黃柏 粉丹皮

雲苓 炙甘草 米仁 建澤瀉

陽虛嗜酒之體。屢爲濕困。以致腰重不耐久坐。左肩臂痛。瘡痍時發。不能

盡洩。經隧之濕。由陽明深入厥陰。爲便難肛痔。爲囊風腿癰。滋蔓無已。皆濕病也。脈濡澹。不宜用剛藥燥劫。議養陽明以清厥陰。冀其緩效。

大生地 歸身 川斷 米仁 製首烏 丹皮 杜仲 豨簽草 生冬朮 萆薢 黃柏

忍冬藤 另服指迷茯苓九酒下

□ 火 症

兩耳鳴。次第失聰。皆因外風內襲而來。據述胸腹氣火上升。爲鼻淵齒衄。胸痹痰多。下迫爲痔瘍。便難或澹。今脈得細弦遲。全屬少陽陽明風火痰三者爲病矣。

潞黨參 陳皮 枳殼 穉豆衣 法半夏 茯苓 胡麻 炒杭菊 麥門冬 丹皮

桑皮 竹茹

五內如焚。起滅無定。時易怒多疑。舌膩口甜。脈弦左尤甚。肝熱由於胆寒。脾痺由於胃滯。所謂五志火動。神明內擾也。隆冬蟄藏之時。宜用育陰潛陽法。

大熟地 阿膠 天冬 茯神 竹茹 牡丹皮 牡蠣 佩蘭葉 蓮心 白芍 澤瀉

棗仁 黑芝麻 另服硃砂安神丸

病閱六年。初因氣滯飲聚。久則絡逆火升。兩月來纔得平臥血止。然飲沫上溢。日必碗許。欬嘔眩悸。齒血牙疳。頸癭面浮。氣阻絡痺。輒覺鬱痛。此疾由於氣火之鬱。偏寒偏熱。非調鬱法也。緩圖尙可少安。第難欲速耳。

西洋參 驢皮膠 金石斛 稽豆衣 茯苓 蛤殼 石決明 旱蓮草 川貝母 海石粉

憂愁重度。手足厥陰動而不靜。以致疝聚於中。火升於上。精洩於下。腕右痞脹妨食。衄腫目昏。額痛。悶惕。痿奕等症。紛擾數年不已。甚至心神不能自主。宜緩調手足厥陰以安心胃。

大熟地 白芍 稽豆衣 龍骨 荔枝 紫石英 棗仁 胡麻仁 池菊 金櫻子

牡蠣 建蓮子 芡實 綠萼梅 砂仁

服育陰潛陽藥以來。春時竟不夢遺。是可喜也。然晨易心悸。悸卽易怒多。

疑懊。懷。此肝膽包絡尙有鬱熱。凡鬱熱之衝。原無定時。而心胃獨當其衝。所以目淚鼻血。齒痛口乾。舌黃便溺。不能了了。脈弦實。相因而來也。宜清肝之用。養肝之體。以調疏泄之職。則膽與包絡皆和矣。

西洋參 白芍 陳海蜃 炒山梔 霜桑葉 大生地 丹皮 金石斛 白蒺藜 石決明

荸薺 火麻仁 女貞子 另燈心湯下硃砂安神丸

□ 燥 症

八月初寒熱似瘧。是新涼外迫。伏暑內動之感證。奈挾食挾怒。而脘痛嘔逆。吐虻特甚。客反勝主。治法不免喧賓奪主矣。腑病宜通。得濡潤而痛減。得澹泄而痛竟暫止。感症之流連肺胃者。每每如此。糾纏一月。病未了了。寒熱又作。頓加欬嗽面浮。則又病中體虛。復加一層秋燥之邪。肺氣益痺。以致腹痛作而齟齬乾燥也。脘痛連及胸背。動輒氣逆。肺之贖鬱極矣。耳鳴汗出。劑頸而還。則病邪傷陽也。腹痛便瘀。溺色似血。病邪傷陰也。體之陰陽雖皆受傷。而秋燥之

邪。大隊尙聚在胸膈之間。脈右虛凝。左小弦數。顧正但須養胃存津。化邪但宜宣肺化燥。眼光但照大局。未可偏執一隅。枝枝節節爲之矣。致於病機之危。何須再說。

西洋參 川貝母 茯苓 金石斛 麥冬 驢皮膠 丹皮 炙甘草 杏仁 橘紅

紫苑 霜桑葉

向有跗腫。或大小足指痛不能行。每發必糾纏累月。近因心境動擾。先覺脚痛。繼以齒痛。延及左半頭額顳頰。甚至身熱左耳流膿。迄今兩旬。耳膿及額俱痛。而徹夜不能成寐。煩躁益增。咽膠乾燥。耳鳴口乾。略有凝血。食少便難。脈兩關見弦。素體操勞憂鬱。由來久矣。心脾營虛是其質。近來復感風燥之火。上燦肺金。金不制木。肝陽化風。火上擾清空。肺胃津液。皆爲消燦。是以現症種種。虛實混淆。宜先用甘涼濡潤。以存津液。以化虛燥。

鮮生地 知母 胡麻仁 夏枯草 茅根 驢皮膠 麥冬 杭黃菊 西洋參 桑葉